

EFESUDEENŊ

Gbêkêê kè Luda kèwe Kirisi guu

¹ Mamoma Polu, Kirisi Yesu zìri Luda poyezina guu, mámbe ma takada kè kè Luda gbê kè aɔɔe Kirisi Yesu náanɛ kɛɛ zaa Efesunɔnɛ. ² Wa De Luda kɔn Dii Yesu Kirisio gbêkêê kɛare, à a gba aafia.

³ Wà Luda wa Dii Yesu Kirisi De sáabu kpál! Wa kuuna Kirisi guu Luda a Ninii aubarika píngi dàwagu zaa musu. ⁴ À wa sɛ a guu anduna kaɛna ã, lɛ wa kuuna gɔ dɛnɛ adona see sai. Yenzi guu ⁵ à gĩakɛ à wa diɛ a nɛnɔ ũ Yesu Kirisi gāzĩ lán èe wɛtɛɛ a poyezi guu nà, ⁶ lɛ à tó bɔ a gbêkɛ gakuidee kè à kèwe a Né yenzidee guu yānzi. ⁷ À guu à wa bo kɔn a aruo. À wa taarinɔ kèwe a gbêkɛ bíta ⁸ kè à kèwe à gè ɔla yānzi. Ŋndɔ píngi kɔn wéɛzɛ píngio guu ⁹ à tò wa a poyezi asii dɔ lán à zèò à kɛ Kirisi gāzĩ nà. ¹⁰ Tó à poyezi pì kɛgurɔ kà, eé pɔ píngi kakɔa Kirisi n̄ Mideenɛ, pɔ kè kú musu kɔn tɔɔtɛo píngi. ¹¹ Luda kè è yā píngi kɛ lán à zèò a poyezi guu nà gĩakɛ à wa diɛ lán èe wɛtɛɛ nà, à wa sɛ a pɔ ũ Kirisi guu, ¹² lɛ wamɔwa kè wa wéɛ dɔ Kirisizi zaa káakunɔ wāgɔ dɛ à tó gakuide b̀rɛnɔ ũ. ¹³ Apinɔ sɔ, a yāpura yā mà, a baaru nnaa kè à a mì sɔ pì sɔ. À guu Luda a zĩnda sèeda kèawa à Ninii kè à à lɛ gbè ũ. ¹⁴ Àmbe túbi kè wé e kpégaau ũ ai Luda gɔ gá a gbèno bo, lɛ aɔ à tó gakuidee bɔ yānzi.

Polu aduakɛna Efesudeenɔnɛ

¹⁵ Beee yānzi zaa gurɔɔ kè ma a Dii Yesu náanekena mà kɔn yenzi kè á vī kɔn Luda gbēnɔ ń pínɡi, ¹⁶ mée kámma bo kɔn Luda sáabukpanao a yā musuro. A yā ègɔ dɔmagu ma aduakena guu. ¹⁷ Mèè wée ke kè De gakuide, wa Dii Yesu Kirisi Luda à a gba ɔndɔɔ à a wée kēare kɔn a Ninii gbāaao, le à e à à dɔ wásawasa. ¹⁸ Mèè wée kea à a nòse wēare, le à e à tāmaa kè à a sisia dɔ, à túbi gakuidee auziki kè à diɛ a gbēnɔne ¹⁹ kɔn a gbāa bíta bɔnsae kè èe zīi kee wamɔwa kè weè à náane keɛnɔ guuo. Gbāa bíta pì zīi kè Kirisi guu ²⁰ gurɔɔ kè Luda à fēe gaan à à vēe a ɔplaazi zaa musu. ²¹ Gwen Kirisi den kpatablerino kɔn ikodeenɔ kɔn gbāadeenɔ kɔn diinɔla ń pínɡi kɔn tó kè wè mì siénneɔ pínɡi. Èe ke anduna tiaa kèkii adonlo, kɔn à kè eé móome dɔ. ²² Ludaa tò à iko vī pó pínɡia, ben à à diɛ baabɔ pínɡi mīdee ũ sɔsine. ²³ Sɔsi pìn Kirisi mè ũ, à de Kirisi kè è pó pínɡi papa gu pínɡia papana ũ.

2

Fee bɔna gaan gēna wēndin

¹ Á de yā gènɔ ũ Ludane a taarinɔ kɔn a durunɔ yānzi. ² Á té anduna kèki tuubazi, a mì siè ãa gbāadeenɔ kínane, Setān kè kpé dɔna lundayamarisaideenɔne ae pì. ³ Wa pínɡi wá de lán ń bà yā se. Weè pó kè wa mè yezi kɔn yā kè wa pɔɔ gbào ke. Wa ina guu wá de gbē kè Luda é pɔfē pitammanɔ ũ lán danɔ bà, ⁴ mode Luda sùu bíta, à yenzi vīwe maamaa. ⁵ Gurɔɔ kè wá de gènɔ ũ wa taarinɔ yānzi, à wa fee kɔn Kirisio lèdo. Á a mì sì a gbēkee guu. ⁶ Kirisi Yesu guu à wa se à wa vēeɔ zaa musu, ⁷ le à e à a gbēke bíta bɔnsae ɔɔaíne anduna

kè eé mó guu yānzi yā maaa kè à kèwe kuuna Kirisi Yesu guu musu. ⁸ Luda a mì sị à gbēkεε guu Yesu náanε kè á kè yānzi. Beee e bɔ a kiianlo, Luda bé à a gba. ⁹ A mịsina e bɔ a yākenā gāzīnlo, lε gbēke tón ĩa dāoro yānzi. ¹⁰ Luda ɔgben wa ũ. Kirisi Yesu guu à wa kε lε wàgō kú kōn yā maaa kè à gīake à diēwee kenao.

Gōna mè dōnkō ũ Kirisi guu

¹¹ Amɔa kè á de bori pāndenɔ ũ ina guu, à laasuu lé a kuuna ziaa. Bāngudeenɔ è beare gefɔɔdeenɔ, mɔde aɔ bāngukεna de gbēntee ɔgbε ũmε. ¹² Gurɔ beeeá kuu Kirisi sai, á de gbē zītɔnɔ ũ Isarailinɔnε. A baka kú Luda bà kuunañyo kōn à légbēñnenao guuro. Á kú anduna guu tāmāa sai ludadōsai. ¹³ Kirisi Yesu guu tia, amɔa kè á zà kōn Ludao yāanɔ a sōzi kīi kōn Kirisi aru gbāaaao. ¹⁴ Àmbe wa kuuna kōo nnaa ũ, à tò Yudanɔ kōn bori pāndenɔ gō mè dōnkō ũ. À mè guu à íbete kè da n dagura bīi ũu gbòro, ¹⁵ à Musa doka kpà guuzi kōn à yādienanɔ, lε à tó aɔ plaa n pīngi gōao gbē dufu mèn doo ũ. Len à n ké kōo nna lε. ¹⁶ À íbete yāa, à n plaa n pīngi kè nna kōn Ludao mè dōnkō pì guu a gana lía yānzi. ¹⁷ À mò à kena nna kōn Ludao baaru kpà amɔa kè á zà kōn Ludaonɔnε kōn gbē kè aɔo kīionɔ dɔ. ¹⁸ Kirisi yānzi wa pīngi wá zé vī wà sō De Ludazi kōn à Nini dōnkō gbāaaao.

¹⁹ Beee yānzi á de gbē zītɔnɔ ke bɔamɔnɔ ũ dɔro, a gō bēdeenɔ ũ kōn Luda gbēnɔ, à uadeenɔ. ²⁰ Àmbe kpé kè Ludaa bò ēε kè zīrinɔ kōn annabinɔɔ dàεa ũ, bensō Kirisi Yesun à ēdaεgbε ũ. ²¹ À guun kpé pó

píngi è kō kūn, ègō gbāa Luda kpé ũ Dii guu. ²² À guu apinō se, á de kpé pì bobōnō ũ, ámbé Luda Nini kúkii ũ.

3

Pɔlu zĩkena bori pāndenɔ té

¹ Bee bé à tò mamoma Pɔlu má de pisina ũ Kirisi Yesune a bori pāndenɔ yānzi. ² Ée ma lán Luda a gběkekennena zĩ dàmɛ mà kɛ a téroo? ³ Luda a asiiyā òdɔamɛ, má kěare féte kò. ⁴ Tó a à kyó kè, é fō à dō lán ma wée kè nà Kirisi asiiyā musu. ⁵ Luda e yā pì o gběkenɛ yāro, ben tia sa à òdɔa a zìrinō kōn a annabinōnɛ kōn a Ninii gbāaa. ⁶ Yā kè utena yāa pìn yè: Kirisi Yesu guu baaru nna mana yānzi bori pāndenɔ gō Luda túbiblerinō ũ lɛdo kōn Yudanō, aō gōńyo mēdōnkōdeenō ũ. Aō baka kú lé kè Ludaa gbě guu. ⁷ Ma gō baaru nnaa pì kpàri ũ gbāa kè Ludaa dàmɛ yānzi kōn à gbāaa kè èe zĩ kɛɛ ma guuo. ⁸ Mamoma kè má kēsāna Luda gběno té, Luda gbāa pì dàmɛ, ben mée Kirisi auziki yāanasai baaru kpaa bori pāndenōnɛ, ⁹ mée asiiyā kè Ludaa e wɛtɛ gbě sānda pínginɛ bōńnɛ gupuraa. Asiiyā pì utena Luda kè pó píngi kè kiia zaa káaku, ¹⁰ ben tia sa à tò kpatablerinō kōn ikodee kè aō kú musunō a ɔndō bori pariinō dō sɔsi gāzĩ. ¹¹ Luda poyezi kè kuu zaa gurō píngi pì lé pàpa Kirisi Yesu wa Dii gāzĩ. ¹² À guu wá zé vĩ wà sō Ludazi kōn swèo kpaena à náanekena yānzi. ¹³ Bee yānzi ma wée kèawa àton tó a nòse yaka nawēa kè mée kɛɛ a musu yānzirō. A bōna maaa yānzimɛ.

Kirisi yenzi

14 Beee yānzi mēē kúe De Ludanē. 15 À kiian à bēdee kē aā kú musu kōn tōtēonō n tó èn n pīngi. 16 Mēē wēē kea à a gba gbāaa a nōse guu kōn a Ninii gbāaa a auziki gakuide lén, 17 le Kirisi vēē a swēn a náanē kē ēē kēē yānzi, a kāsāpēēna gō gbāa yenzi guu, 18 le à e à à yenzi yàasa kōn à gbāao kōn à lezīo kōn à lòo gbáze dō kōn Luda gbēnō pīngi, 19 le à e à à yenzi kē weē fō wà à lé dō pīngiroo dō, Luda papana pīngi pekōrēawa.

20 Luda bíta! Eé fō à kewe de lán weē à wēē ke ke weē à laasuu lé nàla maamaa kōn gbāaa kē ēē zīi kēē wa guuo. 21 Wāgō à tó bōō sōsi kōn Kirisi Yesuo guu ai wa boriia gurō sānda pīngi! Aami.

4

Mēdōnkōkena

1 Mamōma kē má de pisina ū Diinē, ma wēē kēawa a kuuna gō de lán Luda a sisi àgō de nà. 2 À kō fō àgō yekōzi zīndabusana guu kōn nōseyīio kōn menao. 3 À wēē tā àgō lédole kē bō Luda Nini kiia vī bà kē è a dōkōa ū. 4 Mē mēn domē, bensō Ninii pī mēn domē. Lēn tāmaa kē Luda a sisia mēn do le se. 5 Dii mēn do bensō dōnzize mēn do kōn batisi mēn dooo. 6 Luda mēn domē wa pīngi De ū. Àmbe à iko vī wa baadea, ègō zīi kēē wa baade pīngi guu, à kú kōn wa baade pīngio.

7 Kirisi gbēkēē kē wa baadenē, lán à gba dàwe nà lén. 8 Beee yānzi à kēna Luda yān wà bè: Kē à fēē à tà musu, à dò zīzōnōnē aē, à gba dà gbēnōnē.

9 À fēē à tana musu beee de diamē? Beee bè à pīta ai tōte gīzī gīa. 10 Gbē kē pīta pīmē gbē kē fēē à

tà ludambe musumusu ũ, le à gu sãnda píngi pa.
¹¹ Àmbe à gbēkeno gbà zé aōgō de zìrinō ũ, gbēkeno annabinō, gbēkeno baarunnakparinō, gbēkeno pasitōno ke yādannerinō, ¹² le Luda gbēno gō kú à zī soru guu, le Kirisi mè gbāa kũ, ¹³ ai wa píngi wàgō gá ká Luda Né náane dōnkō kenaa à dōna dōnkō guu, le wà gō gbē papanano ũ Kirisi kè pó píngi pèkōrea bíta lén. ¹⁴ Tó lēme wégō de né fēte kè wè òndō kōn mōnafikio kēñzi wà n sāsāno ũ dōro, kè yā dufu dannena è n sé lán ãa ke ísō bà. ¹⁵ Auo, wé yāpuraa o kōn yenzio wà gbā yā píngi musu Kirisi kè de à mì ũu guu. ¹⁶ À guun mēgu píngi è kō kũn aō nakōa kōn tīino gbāaa, ben mēguuno è zīi ke a zéa, mè ègō gbāa àgō kaara kōn yenzio.

Kuuna zi kōn kuuna dufuo

¹⁷ Beee yānzín mée yā ooare kōn Dii tóo, mée a gbāao làakari. Àtongō kuu lán kifii kè aō nōsefutakēe dōñne aeno bàro. ¹⁸ Aō laasuu n kē yōnkō, aō zā kōn wēndi kè Luda è kpámmao, kè aō wée sia, bensō aō swā gbāaa yānzi. ¹⁹ Aō nōse vīro, aō n zīnda kpà wísaiyāa, aō dà zaa bori píngi kēna nii vī. ²⁰ Amōano sō, ée Kirisi yā dada lero. ²¹ A à yā mà, ben Yesu guu a yāpuraa kè à vīi dàda. ²² Wà òare à o kpá a dà zii kè dōare aēzi, kè yàka a pónidēna zaaano yānzi. ²³ Wà òare à a nōse liē a laasuu gō dufu, ²⁴ é dà dufu kè Ludaa kè lán a pó bà sé, a kuuna égō adona kuuna yāpuradee ũ yāzēdekēna guu.

²⁵ Beee yānzi à o kpá mōnafiki yāzi, a baade gae yāpuraa o a gbēdaaane, zaake mēdōnkōdeenōn wa ũ. ²⁶ Tó a pō fē, àton durun kero. Àton tó òfāntē gē kpén àgō kpēe pōfēnaro, ²⁷ le àton Ibilisi gba zéro

yānzi. ²⁸ Gbē kè è kpāi o yā kpāi tó. À wée tã à zĩ maaa ke kōn a ɔɔ, le à pó e à takaasideenɔ gba. ²⁹ Àton tó yā zaa ke bɔ a lénlo, séde à zédee kè eé gbē kaara, à ke àre ũ gbē kè aɔɔe maanɔne. ³⁰ Àton Luda Nini kè kú adona da pɔsiaanlo. À de sèeda kè Ludaa kèawa ai a bogurɔzĩ ũ. ³¹ Àton ke ïi kōn gbēkeoro. À pɔfē tó kōn pētēo kōn patana gbāaa kōn gbēsōsōnao kōn pāsĩ bori sānda píngio. ³² Àgō gbēkēē vī kōo. Àgō kō wēnda vī. À sùu ke kōo lán Luda sùu kèao nà Kirisi guu.

5

Kuuna gupuraan

¹ Lán á de Luda né yenzideenɔ ũ nà, à à zékpae sé. ² Lán Kirisi yewazi nà à gí a wēndizi wa yānzi sa'obo kè à gū nna Ludane ũ, à tó yekōzina dɔare ae le se.

³ Lán á de Luda gbēnɔ ũ nà, èe kō sío wà pāpākēna ke dà zaa bori píngi ke wākū yā ma a té sero. ⁴ Wísaiyā'ona kōn yā dōrɔsai onao kōn fàadi zaa bonao e kō síaoro dɔ, sé sáabukpana yā. ⁵ Àgō dō sānsān kè pāpākēri ke dàzaade ke wākūde ke é kpata kè bō Luda kiia ble ledó kōn Kirisioro. Pó kè gbē è à wākū kēē gō à dii ũme. ⁶ Àton tó gbēke a sāsā kōn yā pā korioro. Yā beee takanɔ bé eé tó Luda pɔfē pita a yāmarisaideenɔa. ⁷ Àton tó a bà gō kúnýoro. ⁸ Á kú gusiaan yā, tia sa Dií guu á kú gupuraan. Àgō kuu gupura gbēnɔ ũ, ⁹ zaake gupuraa è maa bori sānda píngi ínne kōn yāzēdeeo kōn yāpuraao. ¹⁰ À yā kè è ká Diíne dada. ¹¹ A bà tóngō kú kōn gusia yākēna kè à kaarana vīrooro.

À yā beeenɔ bɔbɔ gupuraa. ¹² Baa yā kè gbē pìnɔ è ke asii guu ona né wíyāme. ¹³ Tó wà bò kɔn yāo gupuraa, wè à sãnsã dɔ, ¹⁴ zaake gupuraa è tó wà pɔ́ píngi e. Beee yānzi wè be:

I'ori ñ vu ñ fεε bɔna gènnɔ té,

Kirisi é guu punne.

¹⁵ Àgɔ a táa'ona dɔ maamaa. Àtongɔ de yɔnkɔɔɔ ũro, sé ɔndɔrinɔ. ¹⁶ Àgae yā kè Luda à zé bɔaree ke, zaake gurɔ kèkiinɔ zaa. ¹⁷ Beee yānzi àtongɔ mɔsaideennɔ ũro, àgɔ dɔ lán Dii pɔyezi de nà. ¹⁸ Àtongɔ kú kɔn wēdenaoro, è pāpāa zīmame, mɔde à tó Luda Nini gɔ zī ke a guu papana, ¹⁹ gbasa à fàadi bo kɔo kɔn saamuɔ kɔn Luda tókpanao kɔn lè kè Luda Nini è daareeo. À lè sí à Dii tó kpá a swè guu, ²⁰ àgɔ De Luda sáabu kee gurɔ píngi yā píngi guu kɔn wa Dii Yesu Kirisi tóo. ²¹ À mì siékɔne Kirisi vīa kè á vī yānzi.

Gɔgbē kuuna kɔn a naɔ

²² A nɔgbennɔ, a baade gae mì sie a zāne lán Diin ée keene bà. ²³ Zaake gɔgbennɔ nɔgbē mì ũ, lán Kirisi de sɔsi kè de à mè ũu mì ũ nà kɔn à Mìsirio. ²⁴ Lán sɔsi è mì sie Kirisine nà, lεme se nɔgbennɔ gae mì sie ñ zānnε le yā píngi guu.

²⁵ A gɔgbennɔ sɔ, a baade gɔ ye a naɔzi lán Kirisi ye sɔsizi nà, à gí a wèndizi à yānzi. ²⁶ À à gbāsī bòn kɔn ío a yā gāzī le àgɔ de a pɔ ũ, ²⁷ le à à kpan'ae ke kɔn gakuio pɔgbε sai yitookūna sai see sai gbāsī sai taari sai. ²⁸ Len à kɔ sio gɔgbē píngi gɔ ye a naɔzi le lán a zīnda mè bà. Gbē kè ye a naɔzi ye a zīndazime. ²⁹ Gbēke è gí a zīnda mèziro. È póblee kpáa è làakari dɔa lán Kirisi è ke sɔsine nà, ³⁰ kè wá de à mèguunɔ

ũ yānzi. ³¹ Beee yānzi gōgbē é a de kōn a dao tó, ašé nakša kōn a našo, aš gōn plaaa é gō mè doo ũ. ³² Asii bíta kú yā pì guu, má è à de le Kirisi dagura kōn a sōsio. ³³ Baa kōn beeeo à de a yā ũ se dō. A baade gō ye a naōzi lán a zīnda bà. Nōgbē sō a zā yā da.

6

Nénɔ yā

¹ A nénɔ, Dii guu àgae a de kōn a dao yā ma, zaake beee bé à maa. ²⁻³ À bèe lí a de kōn a daone, le àgō aafia à gí ke anduna guu. Yā kè Ludaa diē káaku kōn légbēnaon gwe.

⁴ A denɔ sō, àton a nénɔ nòse yakaro. À ní toto à lé damma Yesude négwana ũ.

Zònɔ yā

⁵ A zònɔ, àgae a anduna kè diinɔ yā ma kōn nòse do kōn vīao kōn luganao, lán Kirisin ée keene bà.

⁶ Àton zīi kéne ní wée yānzīro. Àgae Luda poyezi ke kōn yāpuraao kè ámbé Kirisi zònɔ ũ yānzi. ⁷ Àgae zīi ke kōn aīao lán Diin ée keene bà, èe ke gbēnteenlo.

⁸ Àgō dō kè Dii é baade maakena fīa bone, zò kesō wēne.

⁹ A diinɔ sō, àgae kéne le se. À yā pāsī oñnena tó. Àgō dō kè aōpino kōn apinɔ píngi, a Dii kú musu, è yā ke gbēke wée yānzīro.

Gōkebɔ kè Ludaa kpàawaanɔ

¹⁰ Yā kè gōn yè: Àgō gbāa Dii guu kōn à iko gbāa bítao. ¹¹ À gōkebɔ kè Ludaa kpàawaanɔ da píngi, le à e à ze gíngin à Ibilisi òndō fō. ¹² Zaake èe ke gbēnteenɔn wée ɔsi kaańyoro, séde nini zaaa kè aō

kú musunŋ. Aŋŋ dε anduna kèkii gusia kíblerinŋ ũ kŋn n̄ mĩdeenŋ kŋn n̄ ikodeenŋ. ¹³ Beee yānzi à gŋkεbŋ pĩnŋ sée à da pĩngi, lε à fŋ à zε à gí gurŋ zaa zĩ, gbasa à gŋ zεna gĩngin à pĩngi kεna gbera. ¹⁴ Àgŋ zεna gbāa, à yāpuraa dŋ a pii asaa ũ, à yāzεdee da mò uta ũ. ¹⁵ À kεna nna kŋn Ludaŋ baaru nnaa kpá kyatee ũ, lε àgŋ kú kŋn soruo. ¹⁶ Àgŋ ludanaanεkεna kūna sεngbango ũ gurŋ pĩngi, lε à fŋ à Setān kà tédeenŋ dε pĩngi. ¹⁷ À mĩsina sé à kú mŋfura ũ, àgŋ Luda yā kè dε à Ninii fēēdaa ũ kūna. ¹⁸ Àgaegŋ adua kεε gurŋ pĩngi, àgŋ Luda dŋnle gbekaa yā pĩngi guu kŋn à Ninii dŋnne'aεo. Àgae itē kε kŋn mεna bítao, àgŋ adua kεε Luda gbēnŋne n̄ pĩngi. ¹⁹ À adua kεmε dŋ, lε tó mée yā oo, Luda ma gba lé mà a baaru nnaa asii oŋne vĩa sai. ²⁰ Baaru nnaa pĩ yānzi má dε Luda wéēdee kè wà dà kpésiaan ũ. Àgŋ adua kεmε, lε mà baaru nnaa kpá vĩa sai lán à kŋ sio mà kpá nà.

Lézammana

²¹ Wa gbēndo yenzide Tikiku, Dii zĩkεri náanεdee é ma baaru kpáare pĩngi, lε à e àgŋ ma kuuna dŋ kŋn pŋ kè mée kεεo. ²² Ma à zĩawa, lε à wa kuuna oaremε, a nŋsε e à yĩi kū.

²³ Wa gbēnŋ, De Luda kŋn Dii Yesu Kirisio a gba aafia, à a yekŋzina kaaraare kŋn a ludanaanεkεnao. ²⁴ Luda gbēkεε kε gbē kè aŋŋ ye wa Dii Yesu Kirisizi yāana sainŋne n̄ pĩngi.

Luda yá takada kǝn Bokobaru yáo
The New Testament and portions of the Old Testament
in the Bokobaru language of Nigeria

copyright © 2005 SIM International

Language: Bokobaru

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-22

PDF generated using Haiola and XeLaTeX on 11 Nov 2022 from source files dated 9 Oct 2020

c31548a1-5316-53c2-be42-674e0e4c5ae5